



Admir Hadžić, 16.09.1975. – Magistar ekonomije – smjer Menadžment javnog sektora i uprave, 300 ECTS

Nakon više od 15 godina rada u organima državne službe osjećao sam potrebu da nastavim sa svojim školovanjem, a Sveučilište/Univerzitet „Vitez“ se pokazalo kao prava prilika, jer su među prvima u našoj zemlji počeli sa obrazovanjem kadra koji je deficitaran i prijeko potreban našoj zemlji na putu prema Europskoj uniji. Izbor Sveučilišta/Univerziteta „Vitez“ i Fakulteta poslovne ekonomije pokazao se kao pravi pogodak i danas, nakon više od 3 (tri) godine od odbrane magistarskog rada, sasvim sam siguran da sam donio pravu odluku.

S obzirom da nije bilo puno studenata zainteresovanih za oblast javne uprave, tokom studija sam imao priliku da dobijem punu pažnju i posvećenost profesora i asistenata, koji su svojim znanjem i nesebičnošću doprinijeli da naučim ono najbolje i najpotrebnije, a sve kako bi dodatno usavršio svoje znanje i iskustvo iz oblasti javne uprave.

I danas sam uposlenik u organima državne službe Zeničko-dobojskog kantona i dalje radim posao koji volim, koji razumijem i za koji sam se obrazovao, samo sa puno više znanja i želje za novim izazovima i sa većim mogućnostima za stvaranje kvalitetnije i bolje javne uprave.

Nakon završetka studija uz pomoć profesora sa Sveučilišta/Univerziteta „Vitez“ objavio sam i svoj prvi stručni rad i prisustvovao prvoj međunarodnoj konferenciji, a nakon toga sam samostalno nastavio sa istraživačko-naučnim radom u oblasti javne uprave, tako da danas imam objavljena 4 (četiri) stručna/naučna rada i prisustvovao sam na 4 međunarodne konferencije u našoj zemlji i inostranstvu.

Također, nakon odbrane magistarskog rada pružila mi se prilika da prisustvujem mnogobrojnim seminarima i obukama, naročito onima iz oblasti javnih nabavki i javno-privatnog partnerstva kao centrom moga zanimanja u oblasti javne uprave i ujedno temom moga magistarskog rada, a na kojima sam stekao dodatna znanja i vještine neophodne za obavljanje svakodnevnih radnih zadataka. Stečena znanja će mi sigurno biti od velike pomoći s obzirom da planiram da upišem i doktorske studije na Sveučilištu/Univerzitetu „Vitez“.

Uvijek, pa tako i ovim putem, mladima koji su na pragu odluke koji fakultet da izaberu, preporučujem da prije svega upišu onaj fakultet i onu oblast koju vole raditi, da im studiranje bude prilika da nauče ono najkorisnije i najbolje što se može naučiti, a što će moći sutra primjeniti u praksi, da aktivno učestvuju u svim nastavnim i vannastavnim aktivnostima, da tragaju za znanjem i specifičnostima u oblasti za koje se odluče studirati, jer samo tako će biti prepoznatljivi i biti traženi od strane poslodavaca u našoj zemlji, ali i u inostranstvu.